



^ Tiels yaks ei la carpuiglia sil fèl para pli derasada che tier outra biestga.

FOTO ANGELIKA BÜCHLI

> Ils carpels dil fèl dallas vaccas ein in mied tschercau dalla medischna tradiziunala in China.

FOTO CC BY-SA 3.0/IMAGEBROKER, ULRICH NEHOF



Carpels dad aur el fèl dalla vacca

Ella pressa agrara ei la carpuiglia dil fèl dallas vaccas actualme in grond tema. La medischna tradiziunala chinesa attribuescha a quella crappa in effect curativ encunter surpeisa ed aulta pressiu dil saung. Consequentame in eis chines promts da pagar aults prezis per quels carpels. En ina mazlaria sursilvana ei la carpuiglia dil fèl dalla biestga in tema, entochen ussa denton buca pervia da sia valur.

ANDREAS CADONAU/FMR

«Gie, quei ei absolutame in plausibel», gi *Bina Nussli* che meina a Flem ina practica per medischna chinesa tradiziunala. Ella ha valetau sin damonda dalla FMR in fatg che pertucca la medischna tradiziunala chinesa e che vegn actualme in tematisaus ella pressa agrara dalla Tiara tudestga. Ina tematica che ha era anflau la via silla front dalla gasetta agrara svizra Schweizerbauer. Tenor quei rapport ei la carpuiglia dil fèl dalla biestga talme in garegiada ella China che la pressa agrara scriva da prezis da 170 francs che vegnan pagai per in gram crappa dil fèl. «Ella China dat ei adina puspei da quels hypes per mieds exotics ed ils Chines ein era promts da pagar grondas summas.» Bina Nussli numna per exempel la corna dil rinoceros. «Per regla vegn pagau fetg bia per mieds che duain haver in effect afrodisont.» Per Bina Nussli sebasa quei effect sulet sin supposiziuns. Ed ella puntuescha che la medischna tradiziunala chinesa practicada en Svizra lavuri buca cun mieds che derivan da tals animals.

Negin effect afrodisont

In effect afrodisont ha la carpuiglia dil fèl dalla vacca buc tenor ils rapports dalla pressa agrara. Ils Chines ein dil meini ch'els carpels dil fèl gi dien encunter la surpeisa e pressiu aulta dil saung. La gasetta agrara svizra ha vultu saver da diversas mazlarias svizas, sch'ellas interquerien il fèl dallas vaccas e sch'els rimmien la crappa, priu il cass ch'ella ei insumma avon maun. Risposta ha il Schweizerbauer retschert sulet dalla mazlaria Bell a Basilea che mazchegia ina buna part dallas 160'000 vaccas che vegnan mazzadas ming'onn en Svizra. Quella mazlaria rimna la crappa dil fèl per vender ella, sco quei ch'il Schweizerbauer scriva. Il diember dalla crappa e per tei prezis ch'ella vegn vendida, tegn la mazlaria gronda per ella. Buca min-tga vacca ha denton carpels dil fèl. Sco ei para

«Quei vai jeu aunc mai udiu.»

Jannis Leandro Venzin, mazler da Mustér

anflan ins tala crappa sulet tier vaccas pli veglias ch'ei bia sin pastira.

Strusch enconuscent

Che la carpuiglia dil fèl dallas vaccas ein talme in garegiada, para buca dad esser fetg enconuscent als mazlers sursilvans. «Quei vai jeu aunc mai udiu», gi il mazler da Mustér, *Jannis Leandro Venzin*. El fa attent ch'il fèl vegni dismiss ozilgi cul buttatsch. «Ei füss era buc aschi emperneivel d'arver il fèl ch'astga pervia da siu cunteng buca vegnir en contact cun la carn.» Dalla valur dils carpels dil fèl ha era il mazler da Trun, *Ivo Nay* aunc mai udiu entatgei. Quella crappa ei in tema en sia mazlaria, denton pervia dad in auter motiv. «Jeu hai in client dil cantun Uri che lai mazzar tier mei dabia yaks.» E tier la razza da biestga che deriva dil Himalaya ei la carpuiglia dil fèl detg derasada. Ivo Nay ha gia stuiu mazzar in yak che piteva da colicas pervia dalla crappa. «Igl elevatur da yaks vul semplame in saver con de-

rasada che la crappa ei en sia muntanera.» Entochen ussa ha Ivo Nay buca rinnau ils carpels dil fèl, en enconuschienscha dils prezis numnai dalla pressa agrara havess el probabel fatg quei. Tenor il rapport dil Schweizerbauer ha in kilo crappa dil fèl dallas vaccas la valeta da 170'000 francs. In kilo aur cuosta pil mument 85'000 francs. Che la carpuiglia dil fèl dalla vacca contonscha magari la grondezia dad in lev, sco quei che la pressa agrara scriva, sa Ivo Nay buca confirmar. «Na, aschi gronda ein quels carpels per bia buc.»

Vender las cuas dalla tscharva

Che la medischna chinesa enquera mieds exotics, ei enconuscent al mazler da Trun. «Jeu vendel las cuas dallas tscharvas.» Per siat francs il toc, sco quei che Ivo Nay tradescha. Quellas cuas venda era il mazler da Rueun, *Romeo Janki* ad in commerziar intermediar. «Tschercadas ein era certas tarscholas dalla tscharva.» Dil hype che pertucca la carpuiglia dil fèl dallas vaccas ha el gia udiu, mo il mazler da Rueun tegn pauc dalla euforia. «Tier nus vegnan las vaccas buc aschi veglias e consequentame in ei crappa sil fèl ina gronda excepziun», gi *Romeo Janki*. «Quei po esser in tema tier las mazlarias grondas.»

Carpuiglia sil fèl dallas vaccas ei era buc in tema ella medischna veterinaria, sco quei ch'il veterinari *Vitus Gartmann* conceda. «Jeu sai buca seregurdar dad esser staus confruntaus cun in cass ch'ina vacca havess giu problems pervia da crappa sil fèl.» La medischna da veterinari lavura ozilgi cun tecnica moderna sco sonografia. E *Vitus Gartmann* gi ch'ins pudessi veser grazia alla sonografia, sch'il fèl dalla vacca cunteng carpels in buc. Forsa survegn la medischna veterinara ina nova sparta da fatschenta ed astga intercurir, sche las vaccas han crappa sil fèl. E lu ei aunc la damonda da sclarir, sche la crappa sauda al possessur dalla vacca ni al mazler.

POWERLIFTING



Savio Giossi, il trener Chris Büchi e Gina Berther (da sen.) suenter haver retschert las arbargias. FOTO MAO

Success per Gina Berther e Savio Giossi

Gina Berther e *Savio Giossi*, omisdus da Tujetsch, han giu success als campiadis svizzers da powerlifting la fin dall'janma vargada ad Yverdon-les-Bains. A quella concurrenz naziunals d'alzar e stuschar peisas ein dus novs records svizzers reussi a *Gina Berther*. Ella disciplina d'alzar ord la schanuglia ha ella migliurau igl agen record per 12,5 kg sin 152,5 kg. El trer sur la crusch ha ella contonschiu la peisa da 205 kg, 10 kg dapli ch'entochen ussa. Sco quei che *Gina Berther* ha detg enviars la FMR, ei quei in record mundial inufficial in sia categoria tochen 80 kg. En alzar sil baun ha ella contonschiu la peisa da 87,5 kg.

Savio Giossi ei separticipaus ella categoria dils giuvenils entochen 19 onns, respectivame in tochen 67,5 kg. En tuttas treis disciplinas ha el alzau peisas che negin da sia vegliadetgna haveva alzau entochen uss ufficialme in Svizra: 200 kg cun ir ella schanuglia, 135 kg giu dil baun e 205 kg sur la crusch. *Gina Berther* e *Savio Giossi* ein stai mingamai ils sulets en lur categorias. (cdm/fmr)

VUORZ



En Svizra dat ei varga 3800 species da tschittas. FOTO AUGUSTIN BELLI

Referat davart las tschittas

Sonda, ils 29 da mars 2025 allas 20.15 referescha *Jürg Schmid* da Glion ell'Uclivetta dil hotel Ucliva a Vuorz davart las tschittas. La tschitta dil di che sgola la stad d'ina flur a l'autra ei savens il simbol per ina natira variaonta ed intacta ni sco ins di oz: ina gronda biodiversitad. Tuttina ein ellas mo ina part dallas varga 3800 species da tschittas ch'ei dat en Svizra. La tschitta dalla notg e las tschittas pingas ein bia pli numerusas e lur stil da viver el zuppau ei fetg fascinonts. *Jürg Schmid* emprova da dar in'investa el mund dallas tschittas dalla Svizra e da mussar co nus savain esser pli precauts cun nies ambient. Il referat vegn purschius da Cultura Vuorz, l'entrada ei libra, collecta. (cdm/fmr)

GLION

Buorsa da resti d'affons

Mardis e mesjamna proxima, igl 1. ed ils 2 d'avrel 2025 ha liug la buorsa da resti d'affons da primavera e stad 2025. Quella buorsa ha sco adina liug ella sala dalla Casa Cumin a Glion. Gia il gliendisdis, ils 31 da mars 2025 dallas 19.00–20.00 ed il mardis, igl 1. d'avrel 2025 dallas 8.30–14.00 san ins surdar la ruba per la buorsa. Il medem mardis suentermeizdi dallas 17.00 tochen las 19.00 e la mesjamna, ils 2 d'avrel 2025 dallas 09.00–16.00 ha liug la vendita dalla vestgadira d'affons. Acceptada vegn tenor las organisaturas vestgadira d'affons da primavera e stad ch'ei bein mantenida, schubra ed entira entochen e cun la grondezia L (giuvenils). Igl ei era pusseivel da purtar a la buorsa calzers, sez d'affons per metter egl auter, termalg, cudichs, carrosschas, velos e trotinets. Ulteriuras informaziuns datti sin la pagina d'internet www.ilanz-glion.ch sut occurrenz. (cdm/fmr)